

Zeitschrift: Il glogn : calender dil pievel : annalas per historia, litteratura e cultura romontscha
Band: 27 (1953)
Artikel: 20 onns scola professionala della Cadi
Autor: Wieland, Adalbert
DOI: <https://doi.org/10.5169/seals-881394>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 31.07.2025

ETH-Bibliothek Zürich, E-Periodica, <https://www.e-periodica.ch>

20 onns scola professionala della Cadi

da Adalbert Wieland, scolast sec.

La scola professionala della Cadi, creada igl onn 1932, ei bein la pli biala instituziun sociala scaffida enteifer ils dus davos decennis ella Cadi. Ella ei stada ina necessitad dil temps, in ver basegns de segidar culla giuventetgna. Ella ha daveras gidau biars enten sepreparar per ina clamada e ha aschia attribuiu a promover in prospereivel avegnir a bia famiglias e cheutras augmentau il beinstar general dell'entira vallada.

Duas apparenzas dil temps pretendevan avon 20 onns da geniturs e mussaders in pli grond quitaun per la giuventetgna. Dapi ils anno 30 fageva il stan puril atras ina greva crisa. La nunsurportabla sbassada de prezis per tuts products agricols scaffeva la nunpusseivladad d'ina andanta existenza, principalmein leu, nua che la ierta dil pur stueva aunc vegnir partida. En ina buca megliera situaziun sesanflava il luvrer. Dapertut manco de lavur ed en mintga vitg ina roscha manuals senza occupaziun ed entrada. En quella disfortunada situaziun ei scolast sec. Sep Mudest Nay da buna memoria staus in dils emprems che ha viu la necessitad dil temps ed il mument nundispensabel ded encurir novas pusseivladads d'existenza per nossa giuventetgna muntagnarda. Sia devisa secloma: «Il mistregn sto vegnir promovius.» La clamada de mistregn ei aunc el cass ded absorbar bia forzas giuvnas e per part lischentass ord nossas famiglias de purs e de luvrers. Aschia san ins segidar sin tuttas varts ed en special pertgiral il pureser dal prighel d'ina parcellaziun che munta per quel la segira ruina. Mo co realisar quei plan? Sco emprem pass sin quella via seresolva Nay de promover la fundaziun ded ina scola professionala.

Sco scolast sevolva el tier la conferenza scolastica della Cadi per gl'emprem agid e sustegn ella realisaziun de siu plan. Ella conferenza dils 15 de mars 1930 a Trun ha Nay referiu sur il tema: «Il quitaun per la giuventetgna ord scola». Oratur sco el era, eis ei stau per el lev de perschader ed entusiasmar ses auditurs della necessitad de scaffir aschigleiti sco pusseivel ina scola professionala ella Cadi. La medema conferenza ha elegiu ina commissiun de tschun commembers cun Sep Mudest Nay sco president ed incaricau quella ded immediat semetter vid la lavur ed empruar de realisar il plan avon maun.

Duas pusseivladads fuvan dadas per arrivar tier quei intent. Els biars cass ein las uniuns de mistergners las purtadras della scola professionala. Il patrun ha siu grond interess che siu emprendist sappi imprendar siu mistregn en uorden e perquei ei la scola de professiun per el de gronda muntada. Las uniuns de mistergners arranschan perquei savens las scolass, sorprendan sezzas il menaschi de quellas e sustegnan ellas finanziamein entras contribuziuns ord lur atgnas cassas ed entras sacrificis finansials dils singuls patruns. L'emprova de surdar l'erecziun e menaschi della scola professionala allas uniuns de mistergners della Cadi ei denton stada senza success, essend che quellas fuvan buca sufficientamein organisadas ed unidas per sorprendar quella lavur. La commissiun decida perquei de sevolver tier las siat vischnauncas della Cadi e dumandar dad ellas la fundaziun ded ina scola professionala comunabla. Cun far referats en mintga vischnaunca e seconferir cullas singualas suprastonzas communalas ein ils commembers della commissiun sedai tutta breigia ded orientar ils vischins e perschader quels dil basegns della scola. Malgrad la disfavour dil temps ed il sgurdin dellas relaziuns economicas han las siat vischnauncas dau suatientscha al clom e concludiu tuttas de separticipar vid la fundaziun ded ina scola professionala ella Cadi. Quei spert de sanadeivel progress e de sacrificontadad per ina buna causa mereta renconuschientscha.

A norma della populaziun ha scadina vischnaunca contribuiu all'entschatta ad in fondo de fundaziun della scola per metter neu il necessari mobiliar ina summa à fond perdu. Sin fundament dil reglement della scola professionala della Cadi, staus elaboraus dalla commissiun della conferenza scolastica e suttamess als representants dellas vischnauncas per approbaziun, han quels elegiu il cussegl de scola e surdau a quel il menaschi e la procura per la scola pigl avegnir. La lavur della commissiun della conferenza scolastica ei cun quei stada alla fin ed ils scolasts della Cadi astgan selegrar ded esser stai ils em-prens promoturs e fauturs de quella biala creaziun en avantatg de nossa giuventetgna.

Il cussegl della scola professionala della Cadi ha da cheu naven empalau tuttas fatschentas de quella ed era decidiu sez tuttas damondas finanzialas che pertuccan la scola e siu menaschi. El secompona ord 10 commembers, dals quals scadina vischnaunca elegia le las vischnauncas de Mustér, Sumvitg e Trun 2 commembers. Ei secape-scha bein quasi dasez che la vischnaunca de Breil ha tarmess scolast sec. Sep Mudest Nay sco commember el cussegl della scola professionala e ch'il cussegl de scola ha sil-suenter elegiu Nay sco siu president. Gl'empren fastedi dil cussegl de scola ei stau nua metter la scola sut tetg. Las treis vischnauncas el centrum della Cadi havessen bein tuttas treis giavischau de haver la scola sin lur intschess, mo dapertut muncavan ils necessaris locals. En tuttas scolas professionalas dil cantun vegn l'instrucziun dada per part la sera, ni duront il temps ch'ils ordinaris locals de scola ein libers, aschia che la damonda de locals fa a quellas pintgas difficultads. Per la Cadi cun sia situaziun geografica stueva l'instrucziun vegnir concentrada sin in di ad jamna e cheu fuvan ils locals de scola occupai. Ventireivlamein ha l'uniun catolica «Caritas» a Turitg mess en disposiziun alla scola, e quei gratuitamein, ils locals el hotel Badus a Cumpadials. Quella difficultusa damonda fuva pia sliada. La sonda, ils 6 d'october 1932, ei la scola vegnida aviarta cun 54 participonts. De quels eran 5 mistergners, 47 emprendistas ed emprendists e dus senza mistregn. Ariguard ils differents mistregns e lur repartiziun sin las vischnauncas orientescha la tabella suandonta:

Mistregns:	Tujetsch	Medel	Mustér	Sumvitg	Trun	Schlans	Breil	Diember:
Scrinaris	5	1	7	6	3	—	—	22
Lennaris	—	—	—	—	1	1	—	2
Rodèrs	—	1	—	—	—	—	—	1
Fravis	1	—	—	1	—	—	1	3
Miradurs	—	—	1	1	—	—	—	2
Mecanichers	—	—	—	—	1	—	—	1
Stagnèrs	—	—	1	—	—	—	—	1
Sellèrs	—	—	1	—	—	—	—	1
Picturs	—	—	1	3	—	—	—	4
Cusunzs	1	—	3	2	5	—	—	11
Stampadurs	—	—	1	—	—	—	—	1
Pasternèrs	—	—	1	—	—	—	—	1
Calgèrs	1	—	—	—	—	—	—	1
Taglia-crappa	1	—	—	—	—	—	—	1
Senza mistregn	—	—	—	1	—	—	1	2
	9	2	16	14	10	1	2	54

La biala frequenza della scola gia gl'empren onn ha bein demussau la gronda necessitad de quella. Geniturs e patrurs han spert renconuschiu igl avantatg ded ina scola professionala, aschia ch'igl emprender in mistregn ha priu in rapid e fluent svilup ella Cadi. Il diember d'emprendists ed emprendistas ei carschius onn per onn e ha contonschiu il punct de culminaziun igl onn 1948/49, nua che la scola ei stada frequentada

da 97 emprendistas ed emprendists. Ina comparegliaziun della frequenza els differents mistregns cun quella digl onn de fundaziun de 1932/33 ei forsa interessanta per enqualin ed ord quei motiv suonda cheu era la statistica digl onn de scola 1948/49:

Mistregns:	Tujetsch	Medel	Mustér	Sumvitg	Trun	Schlans	Breil	Diember
Scrinaris	1	1	7	6	4	—	7	26
Lennaris	—	—	1	1	—	—	1	3
Miradurs	—	5	3	—	1	1	1	11
Cusunzs e cusunzas .	2	—	7	5	8	1	3	26
Fravis	—	—	2	—	—	—	2	4
Installateurs	1	—	1	—	—	—	—	2
Mecanichers	—	—	—	2	1	—	—	3
Calgèrs	1	—	1	2	—	—	—	4
Picturs	—	—	1	4	—	—	—	5
Electromonteurs . .	—	—	1	—	—	—	1	2
Stagnèrs	—	—	—	1	—	—	1	2
Rodèrs	—	—	1	—	—	—	—	1
Mazlèrs	—	—	1	—	—	—	—	1
Vendidras	—	—	2	1	1	—	1	5
Senza mistregn . . .	—	—	—	1	—	—	—	1
	5	6	29	23	15	2	17	97

In'egliada sin la tabella cheu sura demuossa ch'ils treis mistregns: scrinari e lennari, miradur, cusunz e cusunza absorbeschan 3/4 de nossas emprendistas e nos emprendists de mistregn. Quei deriva bein buca mo della predilecziun speciala de nossa giuventetgna per quels mistregns, mobein plitost dellas relaziuns localas che porschan la caschun ded emprender quels mistregns en nossa vallada e de saver star a ca'sia duront il temps d'apprentissadi. A conts babs cun ina gronda figlialonza fuss ei priu la pusseivladad en nossas stretgas relaziuns de schar emprender in mistregn in u plirs de ses affons, sch'el stuess tarmetter els egl jester, nua ch'ils cuosts mo per in muntan sin mellis francs. Mo tgei flurent svilup han nossas fatschentas de baghiar priu duront ils dus davos decennis, nua che nos emprendists de scrinari han giu caschun d'emprender lur mistregn da fundament en nossas fatschentas. Nus duvrein buc'in jester pli per erreger las pli bialas baselgias, hotels e casas en nos vitgs e vischnauncas. E buca mo quei, tier nus vegnan bellezza casas de lenn preparadas e luvradas si da nossas fatschentas indigenas e silsuenter transportadas en vitgs e marcaus della bassa e montadas leu da nos patruns e da nos luvrers. Quei ei bein in factum che fa plascher ed honor a nos mistergners, che dattan lavur e fadigia a nossa glieud ed augmentan il beinstar dell'entira vallada. Quei fuss in'entschatta d'ina decentralisaziun dell'industria ord ils centurms gronds ed in veseivel sustegn della populaziun muntagnarda. Lein sperar che quei svilup cuozzi vinavon e che nossa glieud seigi in di el cass de luvrar tier nus il grond product de nos bials uauls e cheutras dar a nies pievel paun e fadigia.

Avon 20 onns havevan nus ella Cadi mo 2 emprendists de miradur. Igl onn 1948/49 fuv'ei 11. Oz baghegian nos miradurs fortunadamein senza agid jester nossas casas de mir, ed ellas ein buca meins bialas e cumadeivlas che quellas de pli baul.

Sche 26 emprendistas ed emprendists de cusunzas e cusunzs han frequentau igl onn 1948/49 nossa scola professional, ei quei bein ded attribuir allas relaziuns regionalas e specialas. La fabrica de ponn de Trun cun sia gronda cusunzeria ha neu e neu giu in grond diember d'emprendists de cusunzs che han giu caschun de far leu in excellent apprentissadi ed ei fa tutta honor alla fatschenta, sche sia direcziun ha adina risguardau en emprema lingia giuvens ord nossas famiglias e dau a quels caschun ded

emprneder il mistregn. Cons de quels han silsuenter saviu bandunar nies intschess sco capavels mistergners e han anflau egl jester beinpagada lavur ed ina ventireivla existenza.

Il numerus diember d'emprendists de scrinari, lennari e miradur ha lubiu de far cun quels ina partiziun speciala en nossa scola professionala, nua che l'instrucziun sa en tuts graus prender risguard sil singul mistregn. Emprendistas ed imprendists de cusunzas e cusunzs formeschan cun lur grond diember medemamein ina partiziun per sesez e gaudan aschia ils medems avantatgs en tala. Quei fuss gl'ideal dell'instrucziun en scola professionala, che selai denton buca realisar aschi tgunsch en relaziuns de scola silla tiara, nua ch'il diember d'emprendists della medema clamada ei savens fetg pigns. Era tier nus ston ulteriurs imprendists dils differents mistregns vegnir mess tuts ensemen en ina partiziun, nua ch'ins sesprova ell'instrucziun aschilunsch sco pusseivel de prender risguard sil singul mistregn.

Sco gia menzionau ha la scola, cun risguard sin las relaziuns geograficas, concentrau l'instrucziun sin in di ad jamna e quei sin la sonda. Dallas 8½—12 uras vegn ei dau desegn tecnic ed aschilunsch sco pusseivel instrucziun de material e clamada en 4 differentas partiziuns. Scrinaris, lennaris e miradurs formeschan ina, ils cusunzs e cusunzas ded umens ina secunda, las cusunzas de femnas ina tiarza ed ils ulteriurs mistregns ina quarta partiziun. Suentermiezdi vegn ei fatg scola dallas 13.00—18.30 uras e quei en treis partiziuns, e l'instrucziun sereparta sils roms lungatg (tudestg e romontsch ed instrucziun civila), contabilitad, quen e geometria.

La scola vegn dada avon miezdi da 3 instructers ed ina instructra, specialisai mintgin en siu rom de desegn ed instrucziun de material e clamada. Ils roms de suenter miezdi serepartan sin 6 scolasts ord las vischnauncas de Sumvitg, Mustér e Trun. La direcziun e survigilanza ha il prefect della scola.

La conclusiun della scola formescha mintg'onnn in modest act festiv. Enstagl ded in examen oral vegn ei arranschau sin ina dumengia suenter miezdi ina exposiziun dils desegns e da tuttas ulteriuras lavurs en scret e procurau per in referent che plaيدا sur d'in tema ch'intressescha la clamada de mistregn. Tier quella conclusiun vegnan patrums, geniturs e tuts amitgs della scola ensemen culs imprendists, instructers, scolasts e cussegl de scola envidai. Bein per svegliar igl interess della populaziun per la nova instituziun han ins gia dall'entschatta enneu fatg quella fiastetta de conclusiun mingamai en in'otra vischnaunca e quei modus ei semantenius entochen dacheu ed ei semussaus fetg practics e d'engrau. Sco referents han funzionau denter auters enteifer il decuors dils onns ils suandonts signurs:

cuss. naz. dr. Condrau, cuss. naz. dr. Albrecht v. cuss. guv., dr. Darms, cuss. guv. dr. Cahannes, cuss. guv. dr. Tenchio, Felix Huonder, secretari dell'uniun Svizzerza de scrinaris, prof. Gieri Arpagaus, inspectur A. Spescha, dr. Piaget, Cuera, pader Flurin Maissen, pader Vigeli Berther, scolast Victor Durschei, Tini, chef digl uffeci cantonal d'emprendists. Ils nums dils cheu numnai documenteschan bein, ch'il cussegl de scola ei sedaus tutta breigia de procurar per referents de vaglia, aschia che scadina conclusiun della scola prof. ei buca mo stada in bi act festiv, mobein aunc pli, uras instructivas ed edificontas per scadin participont.

Ils abituriants, che han frequentau cun success la scola professionala obtegnan cun caschun della conclusiun de quella in diplom della scola, che duei esser ina renconuschientscha per lur prestaziuns ed el medem temps ina biala memoria ord il temps de lur preparaziun alla clamada. Enteifer ils 20 onns vargai ha la scola saviu surdar 336 diploms ad imprendists che han concludiu lur apprentissadi cun success e fatg lur examens cantonals a Cuera. Bein ina biala roscha.

Ils 29 de fenadur 1945 ei il president dil cussegl de scola, Sep Mudest Nay morts. Siu quita per la scola professionala ha cuzzau entochen la fin. En sia davosa seduta cul cussegl de scola ha el, bein sentend che sias forzas fuvan consumadas, recumandau per la davosa gada il sustegn della scola e giuventetgna de mistregn a cussegliers ed

instructors. La roschada d'emprendists ord tuttas vischnauncas della Cadi che ha accumpignau la bara de lur premurau e renconuschiu um de scola al davos ruaus a Danis, las flurs verdas che quels han tschentau sin sia fossa frestga ein stai in modest engraziament pil grond quitaue che Nay ha giu per la giuventetgna.




† Sep Modest Nay p. m.

En siu stagl ha la vischnaunca de Breil termess signur inspectur Albert Spescha el cussegl della scola professionala, ed il cussegl de scola ha elegiu el sco siu niev president. Cun maun segir e cumplein success ha Spescha menau vinavon las fatschentas.

In dils pli gronds quitaus han ils locals adina caschunau al cussegl de scola. Gia gl'atun 1936 ha l'uniun catolica «Caritas» de Turitg buca saviu schar pli en disposiziun della scola ils locals el hotel Badus, aschia che la scola fuva facticamein sin via. Disai a Cumpadials, ha il cussegl de scola tschercau ded anflar leu albiert vinavon. Quei ei la finala reussiu. Dudisch onns ha la scola professionala anflau tetg a Cumpadials en casas privatas. Scolast Giachen Giusep Degonda ha mess en disposiziun sia gronda sala en sia casa d'albiert, aschia che la partiziun gronda ha giu in adattau local, las ulteriuras partiziuns han stuiu seranschar sco ellas han pudiu. Quei ei stau onns de fastedis pil cussegl de scola, mintg'onn sin rucca de stuer sistir la scola per munconza de locals. Igl onn 1939 ei la casa de scola barschada, aschia che Cumpadials ha per plirs onns era

stuiu tscherchar albiert en casas privatas per sias scolas. Duront quels onns ha il cussegl della scola professionala giu liungas tractivas culla suprastanza communal de Sumvitg ed empruau ded obtener albiert ella nova casa de scola che stueva vegnir eregida. Quellas ein denton stadas senza success ed ein adina puspei idas en scalgias en consequenza della damonda finanziaria. Duront quels onns ei repetidamein era vegniu ponderau e reponderau la damonda, sch'ei fussi buca pusseivel de far cun success ina istanza tier las 7 vischnauncas della Cadi per intimar quellas ded ereger ina casa de scola professionala sin agen quen. Il cussegl de scola ha dau l'incarica de far in sempel plan cun in calcul de cuosts. Quels muntavan, compriu ils locals mo ils pli urgents e necessaris, sin 70 000—80 000 francs. Quei fuss bein stau ina summa de dumignar, sche 7 vischnauncas separticipavan loialmein tenor populaziun, frequenza ed avantatgs della scola, e nus cartein adina ch'il pievel della Cadi havessi el mument decisiv buca disdiu e refusau quei project, che fuva ellas relaziuns de lu ina assoluta necessitad. Ei ha forse muncau empau la curascha de far l'emprova e schar decider las vischnauncas. Il cussegl de scola ha anflau l'execuziun de quels plans per nunpusseivla, aschia ch'era quella emprova ei stada adumbatten. Aschia ha la vischnaunca de Sumvitg baghiau ina casa de scola a Cumpadials, senza saver dar albiert alla scola professionala della Cadi. Cheu ha il vischinadi de Cumpadials sin iniziativa ded entgins amitgs della scola, alla testa sgr. forester Battista Degonda, che fuva representant della vischnaunca de Sumvitg el cussegl della scola professionala, fatg ina nova emprova. Il vischinadi ha schau elaborar in plan ded ereger sil sulom della casa de scola veglia ina casa cun treis salas de scola, correspundend als basegns della scola professionala. Il calcul per l'ereziun de quei baghetg muntava sin 40 000 francs. Ils representants della scola professionala han beneventau quell'idea ed ein immediat semess en contractivas cun Cumpadials per scaffir la basis d'in contract d'affittaziun per quei baghetg. Quel ei reussius; il vischinadi de Cumpadials ha baghiau ed aschia ha la scola professionala anflau gl'atun 1948 albiert ella «Casa della scola professionala» a Cumpadials.



Scola prof. della Cadi a Cumpadials

Treis grondas e bialas salas de scola che corrispundan en tuts graus sufficientamein allas relaziuns stattan oz en disposiziun alla scola professionala della Cadi a Cumpadials. Il contract d'affittaziun ei fatgs per 20 onns per in tscheins annual de 2000 francs. — Laud e honur als iniziants de Cumpadials che han giu tonta curascha e cheutras contribuiu grondamein al svilup ed all'existenza della scola prof. della Cadi. Durent la stad stattan quellas bialas stanzas a disposiziun ad exploraturs che vegnan dalla bassa per passentar lur vacanzas en nossas muntognas.

Ils cuosts per tscheins de locals, che ston senza neginas subvenziuns vegnir reparti sin las vischnauncas secund il diember ded imprendists ch'ellas han, augmentan naturalmein considerablamein mintg'onn ils quens della scola professionala. Quei fuss in veseivel agid e sustegn della giuventetgna muntagnarda, sch'il Cantun e la Confederaziun savessan s'arranschar e sestaliar ded era subvenzionar semeglientas expensas de scola en cass extraordinaris sco quel de nossa scola professionala ei. Quellas subvenziuns fussen segir giustificadas e purtassen era ton fretg sco biaras autras!

Gl'entir menaschi de scola cuosta annualmein entuorn 8500 francs. Cantun e Confederaziun subvenziuneschan en special la salarisaziun dils instructers e material d'instrucziun, che resta en disposiziun alla scola, aschia che la scola obtegn annualmein entuorn 3500 francs subvenziun. Il rest sto vegnir repartius sillas vischnauncas secund il diember d'emprendists che quellas han. Tenor art. 29 dellas determinaziuns executoricas de nies Cantun concernet ils imprendists pagan la vischnaunca de domicil dil patrun ina mesadad e la vischnaunca de domicil digl imprendist lautra mesadad della quota che tucca per mintga imprendist. Ella scola professionala della Cadi vegnan ils cuosts della scola enteifer las 7 vischnauncas reparti aschia, che la vischnaunca de domicil dils geniturs digl imprendist surpren la quota che tucca per quel. Quella scola ha siu agen character. Ella ei fundada dallas 7 vischnauncas della Cadi. Ils imprendists serecruteschan quasi exclusivamein ord giuvs de famiglias che han lur domicil ella Cadi. Sin quella moda de far quen serepartan las expensas bia pli ulivamein sillas 7 vischnauncas che tenor la norma dellas determinaziuns executoricas dil Cantun. La pusseivladad ded emprender il mistregn ei dada specialmein ellas 3 vischnauncas de Mustér, Sumvitg e Trun, nua che las fatschentas ed ils patruns ein. Ils imprendists vegnan denton ensemen ord tut las vischnauncas. Sche l'administraziun della scola fa pia las repartiziuns tenor il modus indicau, ch'ei approbaus dellas suprastonzas e toleraus dil cantun, correspunda ella agl'intent primar che preveda de reparter ils cuosts della scola schi ulivamein sco pusseivel sillas 7 vischnauncas, secund il diember d'emprendists ch'ellas han.

Ina speciala menziun merettan bein ils commembers dil cussegl de scola che fan part de quel dapi sia fundaziun e che han adina fatg lur lavur senza absolut negina indemnizaziun e gratificaziun. Signur fabricant Gion Fidel Tuor ei il cassier della scola professionala dapi 20 onns, ha fatg sia gronda lavur adina cun tutta exactadad e senza retscheiver in rap persunter, tut per amur della giuventetgna e pil beinstar della scola. Signur dr. med. Chr. Huonder ha menau 20 onns ils protocols dellas radunonzas e fatg stedia part de tuttas sesiuns, malgrad sia gronda lavur en sia clamada, e signur Gion Battista Bearth de Rabiis, sez um de fatschenta e mussader a bia imprendists en quella, ei medemamein commember dil cussegl de scola dapi la fundaziun de quella ed ha prestau cheu buns survetschs cun plaid e cussegl. Ad els auda in sincer engraziament per ton ideal e tonts sacrificis per la pagaglia de Diu.

Igl ei stau il redatur che sa apprezzar l'impurtonza e la valeta dellas instituziuns culturalas en nossa vallada che ha giavischau quella cuorta lavur sur della historia ed il svilup della scola professionala della Cadi pil «Glogn de scola 1953». Sche quella attribuescha forsa de stimular vinavon autoritads e mussaders, babs de famiglia e patruns de segidar ed haver bien quita per nossa giuventetgna de mistregn, lu ei gl'intent contonschius.